

दिनांक 24.08.2024  
समय: 18.45 बजे

### आकाशवाणी जयपुर-अजमेर

#### प्रादेशिक समाचार

- प्रधानमंत्री नरेंद्र मोदी काल आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला।
- प्रधानमंत्री नरेन्द्र मोदी काल जोधपुर मांय राजस्थान हाईकोर्ट रा 75 वां स्थापना दिवस रे मौके राखी ज्या जळसा पूरा व्हेवण रा कार्यक्रम मांय सिरकत करेला।
- मुख्यमंत्री भजनलाल शर्मा कह्यो- बधतो प्रदूषण, जलवायु बदलाव अर साधनां ने अंधाधुंध काम लेवण ऊं धरती दिनो दिन कमजोर पड़ रही है।

अर

- प्रदेश मांय कठे-कठे जोरदार मेह बरस्यो- आवता दो दिन मांय कोटा, उदयपुर अर जोधपुर संभाग रा कुछ हलका मांय भारी ऊं घणी भारी बिरखा रा आसार।

.....

प्रधानमंत्री नरेंद्र मोदी काल आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ ई कार्यक्रम री 113वीं कडी व्हेला। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट अर न्यूज ऑन ए. आई. आर. मोबाइल एप माथे संवारे 11 बज्यां ऊं प्रसारित कर्यो जावेला। ई सागे ई आकाशवाणी समाचार, दूरदर्शन समाचार, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई ओ कार्यक्रम प्रसारित कर्यो जावेला। कार्यक्रम रा हिंदी मांय प्रसारण रा ठीक पाछे प्रादेशिक भाषावां मांय ई इण रो प्रसारण कर्यो जावेला। आकाशवाणी रा जयपुर केन्द्र ऊं मन की बात कार्यक्रम रो सिंधी भाषा मांय अनुवाद प्रसारित कर्यो जावेला।

000

प्रधानमंत्री नरेन्द्र मोदी काल प्रदेश रा दौरा सारू पधारेला। वां रो जोधपुर मांय राख्या जावण वाळा राजस्थान हाईकोर्ट रा 75 वां स्थापना दिवस रा कार्यक्रम पूरा व्हेवण रे मौके राख्या जावण वाळा जळसा मांय शिरकत करण रो कार्यक्रम है। प्रधानमंत्री रे जोधपुर आवण रा कार्यक्रम ने ध्यान राखता थकां एसपीजी अर पुलिस रा अहलकार हिफाजत रा इन्तजामात रो जायजो लीनी।

000

केन्द्रीय वाणिज्य अर उद्योग मंत्री पीयूष गोयल कह्यो है के सूक्ष्म, लघु अर मध्यम उद्यम करोड़ों लोगों ने नौकरी-धंधा रा मौका मुहैया करा र अर मोटा उद्योगों री आपूर्ति श्रृंखला बण र देश बणावण मांय योगदान दे रह्या है। वे आज नई दिल्ली मांय 10 वां भारतीय अन्तर्राष्ट्रीय एमएसएमई स्टार्ट अप प्रदर्शनी अर सम्मेलन मांय बोल रह्या हा। गोयल कह्यो के एमएसएमई मोटा उद्योगों अर करोबारियां सारू उपभोक्ता अर आपूर्तिकर्ता रा तौर ऊं काम करे है।

000

केन्द्रीय महिला अर बाल विकास मंत्री अन्नपूर्णा देवी महिलावां ऊं माली तौर ऊं खुद रे पाण ऊबी व्हेवण री अपील कीनी है। वे कोटपूतली बहरोड़ मांय जन्माष्टमी रा सिलसिला मांय राख्यी ज्या कार्यक्रम मांय बोल रही है। वे कह्यो के स्टैंड अप इंडिया कार्यक्रम रा तैत अनुसूचित जाति अर पिछाड़ी तबका री जनतां ने काम धंधा सारू कर्ज दियो जावे है। मंत्री कह्यो के इण रो फायदो लेवण वाळा मांय 78 फीसदी महिलावां है। वे खुद सेवक समूहां री सदस्य महिलावां कानी ऊं बणायी ज्या सामान रा बारा मांय वां सागे चर्चा कीनी। केन्द्रीय मंत्री महिलावां री हिफाजत सारू केन्द्र सरकार कानी ऊं कर्या जा रह्या न्यारा-न्यारा जतन रा बारा मांय ई जाणकारी दीनी।

000

मुख्यमंत्री भजनलाल शर्मा कह्यो है के म्हाणा जांबाज फौजी देश रा असली हीरो है। वे म्हाणी मातृभूमि रा पहरेदार है। आं वीरां रा अदम्य साहस अर हौसलां रे कारण ही 140 करोड़ देशवासी निश्चिन्त व्हे र रह रह्या है। मुख्यमंत्री आज एक निजी चैनल री ओर ऊं राख्यी ज्या कार्यक्रम मांय बोल रह्या हा। ई मौके वे शहीदां री वीरांगनावां अर पिरवार वाळां रो मान कीनो। मुख्यमंत्री कह्यो के प्रधानमंत्री नरेंद्र मोदी फौजियां अर वां रा परिवार वाळां रा भला ऊं जुड़्या केई खास फैसला कीना है।

000

फलौदी एयरबेस टेशन माथे थल अर वायुसेना री ओर ऊं हेलीबोर्न ऑपरेशन चलायी ज्यो। इण रा तैत फौज रा जवान हथियारां सागे हेलिकॉप्टर ऊं मैदान मांय उतर र दुशमन रो सफायो कर र पाछा हेलिकॉप्टर ऊं ई लौट गया। ई दौरान थल अर वायुसेना मिल र अभ्यास कीनो। 22 अगस्त ऊं चलायी ज्यो ओ अभ्यास आज पूरो व्हे ग्यो।

000

मुख्यमंत्री भजनलाल शर्मा कह्यो है के बधतो प्रदूषण, आब-ओ-हवा मांय बदलाव अर साधनां ने बेतहाशा काम लेवण ऊं धरती कमजोर व्हे रही है। मुख्यमंत्री पर्यावरण ने बचावण रा मकसद ऊं आज संवारे जयपुर रा सवाई मानसिंह स्टेडियम ऊं निकाळी ज्यी साइकिल रैली ने रवाना करण रे मौके बोल रह्या हा। वे कह्यो के पर्यावरण ने बचावण सारू सगळां ने मिल र कोशिश करणी व्हेला। मुख्यमंत्री कह्यो के कुदरत ने बचावण सारू बदलाव री सरूआत खुद करणी व्हेला। ई मौके वे सगळां ऊं 'एक पेड़ मां के नाम' अभियान मांय सिरकत करण री अरज कीनी।

000

अजमेर मांय आयुर्वेद विश्वविद्यालय खोल्यो जावेला। ई सारू जमीन तैय करण बाबत् विधानसभा अध्यक्ष वासुदेव देवनानी मौका रो जायजो लीनो अर अहलकारां ने जरूरी हुकम दीना। वे जिला प्रशासन ने महर्षि दयानन्द सरस्वती विश्वविद्यालय कने री जमीन री पैमाइश करण रा हुकम दीना। देवनानी महर्षि दयानन्द सरस्वती विश्वविद्यालय रा कुलपति सचिवालय मांय ई बाबत् अहलकारां सागे चर्चा कीनी। ध्यानजोग है के राज्य सरकार प्रदेश रा बजट मांय अजमेर मांय आयुर्वेद विश्वविद्यालय, आई.टी. पार्क, स्पोर्ट्स कॉलेज, अकादमी अर पीवण रो पाणी मुहैया करावण ऊं जुड़ी न्यारी-न्यारी परियोजनावां रो ऐलाण कीनो हो।

000

भीलवाड़ा मांय नैत्र ज्योति अभियान रा तहत सरकारी स्कूलां रा 12 वीं कक्षा तांई रा कमजोर आंख्यां वाळा विद्यार्थियां ने मुफ्त चश्मा मुहैया कराया जा रह्या है। जिला कलक्टर नमित मेहता आज हमीरगढ़ रा पीएम श्री राजकीय उच्च माध्यमिक विद्यालय मांय ब्लॉक स्तर माथे ई अभियान री सरूआत कीनी। वे बतायो के अभियान रा तहत जिला मांय 1 लाख ऊं बत्ता विद्यार्थियां री आंख्यां री जांच कर र जरूरतमंद 2 हजार 216 विद्यार्थियां ने नजर रा मुफ्त चश्मा मुहैया कराया जा रह्या है। अभियान रा तहत सुवाणा ब्लॉक मांय करीब पांच सौ बच्चां ने मुफ्त चश्मा मुहैया करायी ज्या। केकड़ी जिला मांय यूनिवर्सिटी कॉलेज ऑफ होम्योपैथी री ओर ऊं अजगरा रा राजकीय उच्च माध्यमिक विद्यालय मांय बाल स्वास्थ्य परीक्षण शिविर लगायी ज्यो। शिविर मांय सवा दो सौ ऊं बत्ता विद्यार्थियां रा स्वास्थ्य री जांच कर र वां ने जरूरी राय दीरीजी।

000

भरतपुर रा लोहागढ़ स्टेडियम मांय चाल रही अग्निवीर भर्ती रैली मांय आज कोटपुतली, बहरोड़ अर बानसूर तहसील रा साढे सात सौ उम्मीदवार सिरकत कीनी। आं मांय ऊं 300 उम्मीदवार आगला दौर मांय पूग्या।

000

प्रदेश मांय कठे-कठे आज ई जोरदार मेह बरस्यो। मौसम केन्द्र जयपुर ऊं मिली जाणकारी रे मुजब सब ऊं बत्ती 13 सेंटीमीटर बिरखा बांसवाड़ा जिला रा भूंगड़ा मांय दर्ज करी ज्यी। ई रे अलावा माउंट आबू मांय 12 सेंटीमीटर, कुशलगढ़ मांय 11, प्रतापगढ़ मांय 10, कपासन अर धौलपुर मांय 9-9, रामगंज मण्डी मांय 8, झाडोल, डग, पीपलखूंट, जयपुर, लोहारिया, मनोहर थाना, मारवाड जंक्शन अर देसूरी मांय 7-7 सेंटीमीटर पाणी बरस्यो। जयपुर अर आरे-सारे रा हलकां मांय दिन मांय हल्की बरसात व्ही। जालौर जिला रा जसवंतपुरा मांय लगातार 2 घंटा तांई मूसलाधार बारिश व्ही। ई दौरान हलका रा सुंधा माता मिंदर मांय दर्शन करण सारू गयी गुजरात री एक महिला री पाणी मांय बह जावण ऊं मौत व्हे गयी। बाड़मेर जिला मांय केई ठौड़ां मध्यम ऊं तेज पाणी बरस्यो। झालावाड अर पाली मांय सिंज्या री पौर तेज बरसात व्ही। चित्तौड़गढ़ मांय व्ही बिरखा पाछे तीन नान्हा बंधा माथे चादर चाल गयी है। ई बीचे मौसम विभाग कह्यो है के आज कम दबाव रो हलको मध्यप्रदेश रा पूर्वी भागां रा ऊपर बण्योड़ो है। इण रे आवता 24 घंटा मांय मध्य प्रदेश ऊं व्हेता थकां दक्षिण-पूर्वी राजस्थान ओड़ी बधबा अर तेज व्हेवण रा आसार है। ई तंत्र रा असर ऊं कोटा,

उदयपुर अर जोधपुर संभाग मांय केई ठौड़ां आवता दो दिनां रो दौरान भारी ऊं घणी भारी बारिश व्हेवण री संभावना है।

000

नीति आयोग आशान्वित ब्लॉक कार्यक्रम रा तैत रेंकिंग जारी कीनी है। ई रा तैत देश भर ऊं चुणी ज्या 500 ब्लॉक मांय निम्बाहेड़ा ब्लॉक दूजी ठौड़ माथे रह्यो है। आशान्वित ब्लॉक कार्यक्रम रा तहत नीति आयोग री ओर ऊं चुणी ज्या ब्लॉक मांय सुधार सारू अभियान चलायो जावेला। नीति आयोग मार्च 2024 री रेंकिंग रो ऐलाण करता थकां बतायो के देश मांय उत्तर प्रदेश रा श्रावस्ती जिला रो जमुनहा ब्लॉक अव्वल रह्यो। दूजी ठौड़ माथे रहवण परां निम्बाहेड़ा ब्लॉक ने एक करोड़ रूप्या रो ईनाम दियो जावेला। निम्बाहेड़ा ने प्रदेश मांय अव्वल अर देश मांय दूजी ठौड़ माथे रहवण परां विधायक श्रीचन्द्र कृपलानी अहलकारां, कर्मचारियां अर जनता ने बधाई दीनी है। प्रधानमंत्री नरेन्द्र मोदी 7 जनवरी 2023 ने सचिवां रा दूजा राष्ट्रीय सम्मेलन मांय ओ कार्यक्रम सरू करण रो ऐलाण कीनो हो।

000

अजमेर रेल मण्डल मुसाफिरां सारू टिकट खरीदबा री प्रक्रिया आसान बना दीनी है। मुसाफिरां सारू अब आरक्षित अर अनारक्षित दोन्यू भांत रा टिकट रा चुकारा सारू क्यूआर कोड रो सुबीतो सरू कर दियो ज्यो है। साथ ही दूजा भुगतान ई डिजिटल कर दिया ज्या है।

000

जैसलमेर जिला रा बरमसर हलका मांय सीमा सुरक्षा बल-बी.एस.एफ. री ओर ऊं धरती मां की पुकार, पेड़ लगाकर करो श्रृंगार रा नारा सागे पौधा रोपण रो अभियान चलायी ज्यो। अभियान मांय सीमा सुरक्षा बल रा अहलकार अर जवान मोटी तादाद मांय सिरकत कीनी।

000

चूरु जिला रा सिद्धमुख थाना हलका मांय ट्रक अर ट्रॉली री टक्कर रे कारण व्ह्या हादसा मांय दो जणा री मौत व्हे गयी अर 24 जणा जखमी व्हे ग्या। जखमी लोगां ने सरकारी अस्पताल मांय भर्ती करायी ज्या है। हादसा रा शिकार लोग उत्तर प्रदेश रा रहवासी है जो गोगामेड़ी मांय दर्शन कर र पाछा आ रह्या हा। पुलिस मामला री जांच करी रही है। भरतपुर रा उच्चैन हलका मांय एक सड़क हादसा मांय दो जणा री मौत व्हे गयी।

000

हॉकी रा जादूगर मेजर ध्यानचंद रा जन्मदिन रे मौके मणाया जावण वाळा राष्ट्रीय खेल दिवस रा सिलसिला मांय झालावाड़ मांय 26 ऊं 31 अगस्त ताई खेलां री न्यारी-न्यारी होड़ां राख्यी जावेला। जिला खेल अधिकारी कृपाशंकर शर्मा बतायो के 26 अगस्त ने वॉलीबॉल, रस्सी कूद, नींबू रेस री होड़ां राख्यी जावेला जद के 27 अगस्त ने बैडमिंटन, बास्केटबॉल, लंगडी टांग ,28 अगस्त ने टेबल टेनिस अर फुटबॉल, 29 अगस्त ने मैराथन दौड़, रस्साकसी, हॉकी, , 30 अगस्त ने खो-खो अर 31 अगस्त ने टेनिस बॉल ऊं क्रिकेट खेलण री होड़ां राख्यी जावेला।

000